

## USPJESI STUDENTA ODSJEKA ZA GEODEZIJU GRAĐEVINSKOG FAKULTETA U SARAJEVU NA GRAĐEVINIJADI 2014

Od 08. do 13. maja 2014. godine u Budvi je održano takmičenje sportsko-edukativnog karaktera pod nazivom Građevinijada.



*Slika 1: Učesnici Građevinijade 2014*

Ovo je tradicionalno takmičenje za studente građevinarstva i geodezije fakulteta i visokih škola sa prostora svih šest republika bivše Jugoslavije - Slovenije, Hrvatske, Bosne i Hercegovine, Srbije, Crne Gore i Makedonije. U sklopu Građevinijade, studenti se takmiče u znanju i sportovima. Ove godine održana je 41. Građevinijada čiji je organizator bio Građevinsko-arhitektonski fakultet iz Niša.

Za studente geodezije je upravo 41. Građevinijada od naročitog značaja, obzirom da je ovo ujedno prva Građevinijada na kojoj su, u sklopu takmičenja u znanju, uvedeni predmeti iz oblasti geodezije, i to Teorija geodetskih mjerenja, Teorija izjednačenja i Inženjerska geodezija. Takmičenja u znanju su bila timskog karaktera, pri čemu su studenti u grupama po troje pristupali rješavanju zajedničkog testa i kroz dogovor odgovarali na pitanja. Dakle, svaka visokoškolska ustanova je bila dužna formirati timove, koja su brojala 3 stalna člana i rezervne članove. Tim koji je predstavljao Građevinski fakultet Univerziteta u Sarajevu u znanju iz oblasti geodezije činili su: Behić Edina, Grabus Enes, Horozović Džana i Savić Marko. Ova Građevinijada predstavlja i prekretnicu jer će takmičenja znanja iz oblasti geodezije od sada biti sastavni dio ove manifestacije.

Predstavnici iz Sarajeva osvojili su sljedeća mjesta: 1. mjesto iz predmeta Teorija geodetskih mjerenja (koje dijele sa Građevinskim fakultetom u Beogradu), 1. mjesto iz predmeta Teorija izjednačenja (koje dijele sa Građevinskim fakultetom u Beogradu), te 2. mjesto iz predmeta

Inženjerska geodezija. Prema konačnoj rang listi takmičenja studenti geodezije i građevine su se izborili za drugo mjesto u ukupnom poretku. Ovako zapaženim rezultatima studenti geodezije su podstakli svoje kolege i dokazali da je Odsjek za geodeziju Građevinskog fakulteta u Sarajevu jedan od vodećih u regionu po uspjehu svojih studenata.



*Slika 2: Priznanja osvojena u Budvi*

Veliku pomoć u pripremanju za takmičenje studentima su pružili nastavnici i asistenti Odsjeka za geodeziju Građevinskog fakulteta i to: doc.dr.sc. Admir Mulahusić, mr.sc. Esad Vrce, mr.sc. Jusuf Topoljak i mr.sc. Nedim Tuno.

Pored veoma visokih pozicija u znanju iz geodetskih predmeta, studenti su se izborili i za vodeće pozicije u sportskim aktivnostima. Muška košarkaška ekipa izborila se za drugo mjesto, dok je ženska odbojkaška ekipa završila kao trećeplasirana u ukupnom takmičenju. Treba napomenuti da je bilo veoma teško postići ovako dobre rezultate s obzirom da su na 41. po redu Građevinijadi učestvovala 23 fakulteta sa prostora bivše Jugoslavije.

Sljedeće godine će organizator 42. Građevinijade biti Građevinski fakultet Beograd. Studenti našeg fakulteta će, nadamo se, i tada ostvariti zapažene rezultate.

*Džana Horozović, Marko Savić i Edina Behić*